



Cuira, 22. avrigl 2016

NA A CUSTS DA MILLIARDAS, GEA A PROCEDURAS D'ASIL PLI SPERTAS

A ses di da partida a Cuira ha la Partida socialdemocrata dal Grischun decidì las parolas per las votaziuns dals 5 da zercladur: NA a l'iniziativa da la vatga da latg e NA a l'iniziativa da «Pro Service Public». In NA recumonda la PS era per l'iniziativa per in'entrada da basa nuncundiziunada. GEA di la PS per proceduras d'asil pli spertas. Ella pledescha dad acceptar la revisiun da la lescha d'asil. Tar la lescha davart la diagnosa da pre-implantaziun ha il di da partida decidì la libertad da votar.

L'iniziativa da la vatga da latg n'ha da far nagut cun ina finanziaziun dal traffic gista. Cun transferir daners or da las entradas da taglia per bagegiar vias, vegni a dar ina rusna da 1.5 milliardas francs l'onn en la cassa da la confederaziun. Quai pudess avair sco consequenza ch'i vegn scursanì raps sin auters chomps, sco per exempel tar la furmaziun u tar il traffic public. Ultra da quai stuessan ils chantuns purtar il burdi finanziel. Igl n'è nagina casualitad che ils chantuns cumbattan l'iniziativa. Perquai che l'iniziativa n'è betg gista e dat mo privilegis a quels che nizzegian las vias sin custs da tut quels che pajan taglia, recumonda la PS cleramain in NA al «Schwindel» da la vatga da latg.

Cun la revisiun da la lescha d'asil vegnan las proceduras d'asil scursanidas e quai cleramain. Quai na gida betg mo ils requirents d'asil mobain a nus tuts. Senza la revisiun sa ina procedura durar plirs onns. Quai chaschuna custs e fa donn al process d'integrasiun. Mo tgi che sa gia baud sco ch'i va vinavant po organisar activamain sia vita: emprender ina lingua dal pajais, tscherchar lavur ed in'abitaziun, trametter ils uffants a scola e bagegiar si ina rait da relaziuns. La revisiun meglierescha la situaziun per tuts e merita per quai in cler GEA a l'urna.

L'iniziativa «Pro Service Public» tuna bain ma n'è betg buna. Ella periclitescha in'offerta ch'è unica perquai ch'ella metta limitas memia strictas a l'agir da las interpraisas dal service public. Gist las regiuns a l'ur vegnissan sut las rodas. La PS di perquai cleramain NA a l'iniziativa «Pro Service Public» che maina sin vias pulainas.

A ses di da partida als 9 d'avrigl han ils commembers discutà intensivamain l'idea da l'entrada da basa nuncundiziunada. Tar l'iniziativa, sco quai ch'ella è avant maun datti tenor da la PS dentant memia bleras dumondas avertas, sco per exempel il modus da finanziaziun. Senza ch'e la finanziaziun è reglada è l'entrada da basa nuncundiziunada en emprima lingia in invit da scursanir tar las expensas socialas. Perquai recumonda la PS da dir NA a l'iniziativa.

Libertad da votar decida la PS tar la lescha davart la diagnosa da pre-implantaziun. La dumonda è difficila e tenor la PS ina dumonda da l'etica e betg ina da la politica da partidas.

Per ulteriuras dumondas stat il president dal PS gugent a disposiziun:

- o Philipp Wilhelm, 079 318 77 38